

退

補

齋

詩

存

退補齋詩存目錄

卷二

古樂府

古意

飼蠶詞

海客槎

嫦娥藥

霓裳曲

水調歌

五禽言

五首

鵲巢篇

立秋吟

明妃怨

楚妃歎

當壚曲

白紵詞

吳鉤行

神仙曲

游俠篇

估客詞

長安道

洛陽陌

隴頭水

華山畿

秋蟲歎

四首

中秋望月

雛鳳哀輓王信甫

退補齋詩存卷二

古樂府

永康胡鳳丹月樵

古意

妾織錦郎遠行郎行千萬里那聞妾織聲  
妾手摻摻何足惜只愁郎去無消息郎不歸來且停織  
朝朝目斷望夫石

飼蠶詞

妾本貧家女採桑飼春蠶頭蠶三眠起食葉日一籃  
二蠶又長成食葉日一擔爭奈家徒四壁立典衣無處買

桑葉妾飢猶自可蠶僵將若何朝暮嘆息愁腸多幸有  
富室女見憐持贈一釵度眼前

海客槎

大海漫漫人蹤杳東南萬里波迴繞徬徨四顧無人聲  
有客有客來海表解一問客何方來客亦不知處年年八  
月秋自來還自去解二聞海之渚上通天河瑤臺金闕珊  
樹瓊柯或乘蛟龍或駕鼉鼉風清月白明鏡不波解三乘  
槎而往遙見宮城異茫茫之塵域聞軋軋之機聲寸心  
徒脈脈一水隔盈盈解四此中有人呼之欲出問其里居

牽牛入室仙乎仙乎祕而密

五解

嫦娥藥

嫦娥本是人間女玉粒金丹服幾許無端幻化作嬋娟  
夜夜牢愁那得眠一年一月圓一度翻悔當年服藥誤  
君不見玉兔多擣不死藥能補吾腦全吾形馨香沁入  
五臟六腑十二經下達關元上黃庭八萬四千毛竅盡  
開徹三百六十骨節皆通靈安得人人換凡骨服之壽  
可三千齡

霓裳曲

坎坎鼓蹲蹲舞奏鈞韶揚干羽天子厭聞開元音忽譜  
霓裳入樂府不愛舊曲愛新聲但得承恩生寵榮玉漏  
敲殘夜將半繁絃急管一齊鳴其韻淒以清其音和而  
悅星月滿階前精光何皎潔自入梨園出者稀伴教者  
誰曰貴妃顧曲無誤競歡笑倚聲按拍不停揮千歌萬  
舞聲未已漁陽鼙鼓城頭起聽風聽雨不忍聞華清宮  
中冷於水

水調歌

秋月朦朧照千里一曲調歌聲四起瓊樓玉宇高且寒

惓惓君恩有如此秋風秋月亦何常莫怨浮雲蔽穹蒼  
惟有寸丹不磨泐臣心如水君未忘文字因緣草茅裏  
歌成上達聖天子一輪皓月正當頭想見風流蘇學士  
學士敲殘鐵板時都下傳唱繫人思九重命下汝州去  
記得千秋絕妙詞

五禽言

割麥插禾芒種將過割麥欲晴插禾欲雨一雨一晴天  
作主翻手覆手徒自苦

姑惡姑惡姑惡猶可大姑小姑讒妬殺我小姑伴姑眠



大姑侍姑側姑來前妾默默大姑小姑亦有姑嫁如嫂  
姑當何如

瘦兒瘦兒兒何太瘦死母無知生母妬兒面如菜骨如  
柴有弟有弟澤而肥父兮父兮知不知

行不得也哥哥山行有豺虎水行有蛟鼉豺虎蛟鼉猶  
可避酷哉罔兩與魑魅青天白日能昏蔽昏蔽兮奈何  
行不得也哥哥

啄木啄木其聲剝啄莫學長嘴鳥慣啄王孫屋莫學交  
交鷹貪啄中田粟老蟲穴外爾穴內一飽鑽營鳴得意

豈知旁有五尺童調鉛膠絲陰汝伺

鵲巢篇

小園有鵲巢夜半聞羣鳥爭之作此誌感

病久苦不寐夜半聞烏鳴烏鳴鵲亦噪如來風鶴驚蕭  
蕭木葉脫皎皎寒月盈繞樹各三匝嘈雜乖同聲烏聲  
一何濁鵲聲一何清清濁不兩立交罵如交兵鵲言構  
巢始桑土勞經營一枝欣可借竭蹶功初成爾烏稱強  
項胡與吾曹爭鵲鳴聲愈哀烏鳴聲愈橫如何風雨蔽  
乃為強暴櫻破巢無完卵令我心難平推枕三歎息倏

忽東方明

立秋吟柬朱荻舫刺史

蓮墜湖邊路花紅蓼外洲  
宦游驚物候天地一聲秋  
一  
天地一聲秋寒蛩鳴唧唧  
幽怨不成音令我心悽惻  
二  
悽惻生煩憂天地一聲秋  
涼颼入我室茅屋替人愁  
三  
不愁客中貧祇愁貧中病  
天地一聲秋青鬢凋晨鏡  
四  
鄂渚賦同舟萍踪六載浮  
相思寄南雁天地一聲秋  
五

明妃怨

妾不怨君王寡恩義但怨前生薄命  
今生棄亦不怨畫

工圖形惡但怨絕世丰姿筆難著銜君恩出國門妍與  
媼誰復論道旁來觀者齊聲為妾惜惜妾不嫁巫山村  
胡為遠嫁樓蘭國琵琶一曲和邊笳塵沙漠漠無顏色  
回首漢宮闕遙望玉門關關外明月圓如環恨不照見  
君王顏君王悔悟欲留妾妾身已作溝中葉今世不生  
連理枝來世願化雙蝴蝶

楚妃歎

楚王不好獵那識楚妃賢楚妃賢且仁仍以楚王傳羽  
騎紛馳入林麓不射豺狼射麋鹿麋鹿在野狼在邑獵

犬信狴空徵逐妃待王兮王不歸勸王息駕休打圍妾  
食不甘禽獸肉願一身瘦天下肥

當壚曲

臨邛街上賣車馬薄俗憐貧蓋亦寡酒樓一角颺青帘  
座客紛紛皆名下主人操作初出門一身自著犢鼻褌  
滌器甘與庸保伍茫茫塵世無朝昏朝昏共處卓家女  
手抱絲桐調律呂可憐琴瑟不成音青銅但學河間數  
得錢釀酒盈樽壺人生何必泣窮途寄語坐中醉飲客  
不嫁相如不當壚

白紵詞

只見白紵白不見妾肌膚妾與白紵較顏色恰相如舞  
態翩翩飛輕鳧舞衣皎皎拖霞銖間之以歌曲雜之以  
笙竽琉璃屏裏紅珊瑚香煙繚繞圍御爐天子殿前不  
敢呼嫦娥贈我雙明珠明珠照夜銀燈枯君王醉倩萬  
花扶此時此樂古今無玉階露冷滴高梧誰憐賤妾無  
金夫願侍君王博歡娛

吳鉤行

吳鉤吳鉤子與父仇子不與父仇此冤甯甘休

一解吳王

好鉤吳人好利利令智昏見得忘義

解二

百金重二子輕

子不殺鉤不成磨刀鳴鳴哭子死鉤傳名

解三

鉤之鋒鋌

白於雪鉤上血痕永不滅吳王亦好葉公龍可憐重鉤

不重血

解四

### 神仙曲

黃金臺白玉闕卧烟霞吞日月有骨堅如銅有眉長於

髮

解一

仙不來兮鶴唳猿哀仙之來兮海嘯天開

解二

人人

欲學古仙子千金不惜求方士甘泉宮裏通天臺仙靈

縹緲幾到此

解三

游俠篇

不得其平物必鳴白日報仇恣橫行感君不惜為君死

朱家郭解留其名解一殺人無私怨私怨不為俠一身輕

鴻毛滿腔注熱血解二安陵寶刀白於霜東市西市爭相

望羞煞戰國四公子日在鬪雞走狗場解三

估客詞

大扁估客積金銅小舟估客賣蒿蓬客富妾亦富客窮

妾亦窮半生溷跡波濤中朝來南北暮西東解一上水船

風太逆下水船溜太急估客牢愁妾更愁怕客重財不



重色二解客身如浮楂妾身如浪花中流一會合分手各  
天涯非關估客多薄倖牀頭金盡難為家

長安道

長安道上名利客一生磨盡輪蹄鐵縑塵十丈撲面飛  
何人素衣存本色朝叩金張門暮投許史刺射策詎能  
文上書巧言事青雲從此得階梯腐爛任人嗤羊胃可  
憐臣朔飢欲死無術能索一囊米子雲空負草元手除  
是侯芭誰載酒勸君南轅休北旆自古長安居不易

洛陽陌

陌上草色青青陌上花紅亭亭野草間花紛無數洛陽  
美女何伶俜盈盈十五髮覆額銅駝街前走香輶多少  
冶游年少子羊車望斷馬蹄塵繁華如夢原易醒九陌  
春色嗟飄零祇憐一夕秋風起金谷荒寒飛野螢

隴頭水

關上寒雲愁關前濁水流峻坂九迴聲嗚咽七日七夜  
到隴頭解一隴頭高且曲一坂水一束金創血洗殘陽紅  
幾見清漣澈底綠解二流水本無情愁人百感生哀怨雜  
羌笛如聞離別聲解三水聲流不止明月照千里秦川極

目望迢遙一寸柔腸摧欲死

四解

### 華山畿

噫吁嘻華山畿郎為妾病妾不知妾甫知之郎已危郎  
身死妾心隨本是並命禽獨活亦何為牛車到門妾傷  
悲為郎沐浴更新衣郎在棺兮棺不開兮妾同  
歸噫吁嘻華山畿

### 秋蟲歎

秋宵兀坐涼風不來四壁蛩聲如泣如訴土人  
多以其聲之似者名之遂仿禽言體賦此誌感

紡線婆朝紡線五兩許暮紡線十兩多去年紡線賣線  
買穀今年紡線賣線買犢有犢可耕田有穀可飽腹何  
來催租吏到屋牽我黃犢糶我穀阿婆紡聲嗚嗚哭  
鼠婦鼠婦汝豈無姑豈無夫終日在戶胡為乎朝聽鼠  
婦呼暮聽鼠婦呼糧空倉無隔宵儲秋風陣陣逼庭隅  
飢來驅汝當何如

叫哥哥哥哥叫誰弟誰兄兩同調可憐世上連枝人  
闕牆多被旁人笑不信請聽此蟲吟風雨喚醒聯床覺  
促織促織無時休息日織縑一端夜織素一匹縑以完

官租素以充家食我聆其音心惻惻爾促爾織竟何益

中秋望月

月能照妾面不能照妾心妾心比月潔未許纖塵侵一  
妾在家鄉望郎在異地看明月隔千里團圓總一般二  
皓月圓如鏡偏照小窗前獨坐疎簾裏愁人那得眠三  
見月不見郎郎今在何處對月無一言心事向誰訴四

雛鳳哀輓王信甫家仕上舍卽題其遺集

信甫為邁叟愛子有文名新娶婦自蜀中抵家  
七日而歿邁叟哀之錄其遺稿付梓徧徵題咏

作此却寄

老鳳鳴高岡雛鳳翔其側羽毛初長成紛綸備五色忽

聞老鳳鳴聲哀嗟嗟雛鳳折其一解一雛鳳雛鳳覽德輝

而下之朝餐竹實兮暮宿桐枝謂宜巢於阿閣作王國

之羽儀解二胡為不弔呵壁問天既豐而才遽嗇而年符

采未炳隱耀重泉二十九齡鳳毛已焉解三悲哉雛鳳初

求其凰翱翔巴蜀和鳴鏘鏘歸來七日病膏肓鳳凰分

飛兩斷腸解四老鳳拊膺慟靡已捫管窠哀淚滿紙幸留

文章凡鳥驚一洗萬古空餘子解五我為雛鳳哀更為老

鳳慰遺編擎出返魂香不壽其身壽其世惟達人之觀  
化羌彭殤而一致

退補齋詩存目錄

卷三

古體詩

咏古

二十五首

擬孟襄陽夜歸鹿門歌

問菊篇

讀韓昌黎集

讀范少伯傳

讀屈子傳

讀岳武穆傳

破鏡詞

松化石歌

方巖山

謁先伯父宏齋公墓

溪春行



西湖秋泛

答嗤字癖者

題蕭棟鄉封翁桐屋讀書圖

思歸

鵲巢歌頌趙紱庭孝廉

退補齋詩存卷三

古體詩

永康胡鳳丹月樵

咏古

盤古未生時不知有天地無端分陰陽兩儀洩元氣黃  
帝戰阪泉兵戈始階厲洎乎堯舜朝洪水蛇龍崇惟其  
混沌開是以禍患至何若鴻蒙初天下安無事  
天地人皇氏百年一轉瞬一萬八千年其壽各難信一  
皇干支分一皇晝夜定一皇相山川九州別涂徑計此  
數萬年紀載亦僅僅願起上古人執手相問訊

構巢而營窟安身卽樂地後世創棟宇雕鏤窮壯麗飲  
血而茹毛果腹有至味後世羅珍饈鼎俎水陸備波流  
日以頽風俗日以敝所以陶淵明神游葛天氏  
庖犧不畫卦今古無文字一畫以開天遂洩苞符祕首  
出垂典墳煌煌經籍備乃有註疏家聚訟如開市下此  
詞章學亦各炫才智流及帖括言制科用取士一笑佔  
畢儒都拜庖犧賜

教耕藝五穀不聞有秕稗辨藥作方書民生鮮癆瘵日  
久失本真人心生機械良莠聽蕪雜惰農甘怠懈蒿艾

當獲苓欺世風日壞神農不復生悠悠發深喟

截竹以為簫五音分徵角鑄金以為鐘命作咸池樂  
闋世百千載鄭聲趨煩數尼山正雅頌古音久已邈  
樂在六經中誰歟資商摧嗟嗟律呂亡伶倫不復作

用賢如帝堯萬事鮮叢脞四岳薦有虞帝曰試哉可  
當其側陋時境遇亦坎坷不歷大麓艱焉能大寶荷  
舜亦善用賢禹右而皋左郅治夫何為恭己南面坐

有四不才子盛世驕且橫有一不肖子傲與丹朱衡  
四族在叔季兇鋒誰敢櫻商均若繼世神器誰與爭  
一則

投荒裔一則隸編氓大舜所以大千古垂鴻名

夏后德無間大孝炳千秋乃父九載功詎無一良籌黃  
熊死羽淵此心甯甘休胼胝歷八年前功棄者收山川  
告莫定幹蠱宏遠猷美哉明德遠夏后誰與儔

中天崇揖讓征伐自湯始殷祚六百年亦以征伐止天  
道如循環盛衰相伏倚商家賢聖君六七作而已帝辛  
焚鹿臺坐看九鼎徙湯孫且復然何況反側子

武庚封殷侯隱懷復讐志管蔡為殷臣顧國忘親義或  
曰孝與忠惜未明天意天意有所歸何庸生希覬孰若

微與箕王侯終不事孰若夷與齊叩馬兵不避商臣不  
臣周風俗厚所致成周開基初亦以忠厚治綿綿八百  
年靈長古無二

欲為萬世主先築萬里城萬里城長在二世主已更九  
州不一姓拙哉嗤秦嬴自恃關中險天下莫與爭咸陽  
一炬焦國傾城不傾長城為誰築鬼哭聲吶嚶

漢高善將將不及一漂母進飯哀淮陰恩比推食厚烏  
盡藏良弓免死烹走狗人言果非誣帝心母乃負所以  
張子房願從赤松叟

先武有故人魏魏忘勢位帝座犯客星坦腹無芥蒂遂  
全子陵高風誼超百世勗哉車笠盟不啻山河誓

溫公不帝蜀紫陽正其誤堂堂本漢裔正統復誰付或  
疑武擔南卽真殊急遽英雄舉大事小讓非所顧傷哉  
白帝城託孤當遲暮嗣子不象賢河山終割據

曹瞞不廢漢其心尚有君欲為周文王服事貌殷勤丕  
也不如父竟作受禪文遷流及五代唐虞何紛紛始嘆  
真奸雄未肯首惡名所由司馬氏猶有取其人

生子如仲謀萬世蒙譏訕一再稱魏臣封王亦顏汗赤

壁千里火老瞞心膽戰倘與蜀終和豈容曹竊篡胡為  
保江東以此夸勝算

兩晉百餘年昏昏如醉夢伏莽五胡興蒙塵二帝痛神  
州遂陸沈半壁王馬共千古說六朝只供文筆用

我觀南北朝人主屢廢置二十有七君誰歟顧名義篡  
奪紛相循荒淫出一致骨肉尋斧斤本根忘蔭庇國祚  
不久延安望天下治

剪綵以為花開久不知落拔髦以留巢人有不如鶴洛  
陽帝王都繁華無不作宮女數千騎爭為清夜樂挽舟



八萬人錦纜邗江泊窮奢而極侈國是同戲謔雷塘土  
一邱飛燐哀寂寞

治外須治內正人先正己唐室亂宮闈殺吉納妃始末  
幾武與韋穢德不勝指可憐酒甕中二姬骨醉死貴妃  
相其兄惠妃殺三子自此為亂階椒殿閑如市牝雞不  
司晨胡為鳴不已后德如長孫千載一人耳

藩鎮各瓜分五季裂疆土卜年五十四八姓十三主首  
惡惟朱三起自黃巢伍石晉尤卑卑稱兒媚戎虜十萬  
橫磨劍不能耀威武周祖頗英明王樸為帝輔惜哉年

華促祚不壽千古誰歟拯斯民天開宋太祖

澶淵呼萬歲勁氣奪契丹奈何遽議和不謀百年安北  
宋既不振南渡勢尤孱廟堂紛聚訟誰肯開兵端歲幣  
增千萬強顏博虜歡卒之大事去航海無安瀾終始為  
和誤悠悠千載歎

世祖英武資首出重儒術開國宏規模自茲學人出逮  
至仁宗朝成憲隆紹述周程十大賢亦入孔子室下詔  
行科舉循名必責實宰相用讀書服膺永勿失

天下判三教聖賢有義路釋道殊邪正莫為異端誤可

憐建文君祝髮將安去繼曉一庸僧請帑發內庫更有  
陶仲文高向金鑾步勸帝事齋醮給曰慈航渡可灼進  
紅丸服之能無數長生不可求祇以欺婦孺試問佛與  
仙於今在何處

擬孟襄陽夜歸鹿門歌

暮山凝紫煙光微人聲水聲喧江磯夕陽欲落放船好  
踏莎便歛鹿門扉鹿門深鎖月皓皓策杖巖阿憶龐老  
化鶴一去幾千年落葉滿山紅不埽

問菊篇

齋中植菊數十盆歷秋盛開頃自杭回已有根  
無葉有葉無花矣作此調之

淵明愛菊籬東開南山照影秋徘徊遲暮如此歸去來  
富貴人間何有哉我家百盞昔手栽母養護愛同嬰孩  
花前擬縱三百杯零落詎意餘枯亥爾視桃李猶興臺  
胡為不禁風雨摧疎枝忽向斜陽頽晚節不終吾疑猜  
得毋仙子嫌塵埃翩然羽化歸蓬萊月來但照青莓苔  
明年倘肯陪尊壘為汝早釀葡萄醅

讀韓昌黎集

昌黎先生唐巨儒力崇正學鋤浮屠原道原性濡大筆  
遙遙八代衰能扶頑廉懦立聞風起迴瀾屹作中流砥  
浩氣彌綸天地間孟子而後一人耳上書伏闕龍鱗櫻  
諫迎佛骨天為驚臣罪當誅主明聖一官遠謫潮陽行  
朝登九疑山夕渡湘江水藍關雪擁路千盤秦嶺雲橫  
家萬里孤忠耿耿通穹蒼齒搖髮白神明強惟德格天  
誠格物唾手驅鱷如驅羊平生直筆多遭忌太息樂安  
空獻媚突兀淮西十丈碑口沫手胾寶文字五百年來  
吾道昌千秋俎豆流馨香援佛歸儒一髮繫誰其繼者

朱紫陽

讀范少伯傳

智哉范大夫知幾泛五湖苦心建三策唾手平句吳大名之下難久居高蹈獨攜傾國姝奇貨可居甘市隱到處栖止類賈胡良賈深藏有若無積而不散毋乃愚累貲巨萬不為寶分與州鄉諸父老攜家載寶遷於陶扁舟一葉天風號牧豕蓄魚利萬倍自號朱公名逾高海外經營歷三徙芳躅遠追赤松子吁嗟乎鳥盡弓藏走狗烹保全功名古有幾

讀屈子傳

哀哉屈子多離憂呵壁問天天為秋祇今詞賦懸日月  
長卿子雲非其儔初為左徒明治亂博聞強識工文翰  
一從上官讒言生君臣交疎道不行忠而被謗信見疑  
丹心碧血蒼蒼知解組歸田猶戀闕上書泣諫誅張儀  
誤國何來公子蘭殷勤勸結強秦歡反歡為怨忽割地  
王乃客死留函關心繫懷王恨不反行行澤畔秋風晚  
王聽不聰可奈何披髮長吟嗟偃蹇澧蘭沅芷香無塵  
江湖滿地漁為鄰憔悴形容罕相識三閭大夫名未湮

獨清獨醒湘江曲餘生甘葬江魚腹孤臣孽子操心危  
一字一淚懷沙哭我聞賈誼才而狂投書憑弔舟浮湘  
國風善怨怨不怒愠于羣小心憂傷古調獨彈後人祖  
薰香摘豔珠璣吐節義文章兩不磨耿耿元精照千古  
讀岳武穆傳

文官不愛錢武官不怕死武穆之言有如此此真磊落  
天下才況復山易撼軍難摧徽欽北狩宋南渡區區朝  
廷何小哉朝廷雖小善將將將善將兵兵氣壯惜哉賣  
國來丞相相主和將主戰拐子馬倒風雲變背嵬五百



言在卷十一  
藏板  
爺爺軍誓搗黃龍張凱宴將主戰相主和父老痛哭棄  
兩河北庭二聖不復返豈獨父子銜冤多吁嗟乎薦公  
誰宗留守殺公誰秦繆醜天欲亡趙公奈何薦之何功  
殺何咎君不見千古冤莫須有千古名死不朽

破鏡詞

鏡兮鏡兮圓如月圓如月兮千秋澈忽驚瀉地水銀白  
裂帛一聲角半折鏡折角兮可奈何消息循環盈則昃  
茫茫閱世幾千年照人肝膽光不滅一朝光破不可合  
昨見月圓今月缺月缺有時圓鏡破腸斷絕君不見媧

皇鍊石能補天又不見刀環夢裏匆匆別古來聚散亦何常區區破鏡那堪說

松化石歌

松石在永康延真觀前馬仙自然過此指松而言曰此松已三千年矣當化為石詳見郡邑志君不見松山壁立千仞間厠苓益壽邀仙班又不見雨花說法石不頑三生證果超塵寰仙家妙術多奇絕物外煙霞傳秘訣有松特立于雲霄傲盡風霜與冰雪忽然一夜身通靈化松為石龍飛騰是松是石兩不辨混

茫一氣紛流形憑空結撰真怪事觀者如堵咸嗟異我  
聞羽客馬自然餐霞嚙月招羣仙延真觀前樹百尺一  
聲咤叱千羊眠手指虬鱗歷年久歲寒梅竹盟三友霜  
柯鐵幹俄成精鎔鍊疑出媧皇手鬼神呵護風雨寒雷  
轟電掣成奇觀欽崎磊落鞭不走倒卧空山龍虎蟠相  
傳幻跡十餘里昔畫松脂今石齒化將朽腐為神奇壺  
中九華差堪擬回首李唐千載餘劫灰不到仙人居我  
曾愛石高齋儲寶之直欲逾瓊琚

方巖山

永康名山也  
離村十五里

峭石四壁高嵯峨千疊萬疊如雲多開徧芙蓉卅六朵  
滴水晴翠紫煙蘿中有縹緲神仙宅靈旗飄雨山之阿  
夕陽忽轉空晴背飛虹亭畔豁游睎四圍俯仰成奇觀  
春麗鶯花秋螺黛

謁先伯父宏齋公墓

嗟哉伯父君子儒昂藏七尺身魁梧天性至孝容和愉  
斑衣畫舞紅羅瑜花萼相輝敦友于壘簾唱和聲喁喁  
愛書如愛千金珠鄴架曹倉兼陸厨伯父好藏書硯田有歲  
無催租懷鉛握槩劬操觚一衿薄采宮芹腴惜哉鶚薦

睽雲衢明經歲貢天子都臯比坐擁招生徒桃李春風

千萬株蘭芬羶慕人爭趨謙尊而光有若無樂善不倦

輕鎔銖肯堂肯構宏前謨及時行樂庭懸圖

伯父建書屋成懸行

樂圖於壁

有才不過長噓吁玉樓赴召身旋徂墓門木拱酸

啼烏松楸展拜山之隅竹林無復陪歡娛手持濁酒澆

黃壚紙錢夾道飛青蚨魂招華表歸來乎

伯父諱仁模號宏齋讀書

植品里閭推服年未五十而終士林惜之

溪春行

紅泉汨汨飛青峯溪邊雲碓朝昏春杵聲斷續入空際

雲影水影雙溶溶探源尋響步幽徑行跡依稀人罕逢  
惟留雞犬守茆屋稻粱已足三冬供雨後月明絕澗底  
溪流寂寂寒雲封風輪激水隨軸轉岸花朵朵青芙蓉  
歸來策杖碧煙繞聲聲敲碎前溪鐘

### 西湖秋泛

秋色滿晴湖煙波盪空翠乘風泛小舟餐勝使心醉人  
坐白鷗天境絕紅塵地水光兼山光半帆送秋意客攜  
酒一觴逸興波中寄悠然發浩歌俯仰騁幽致湖水洗  
我心湖雲淡客思隄畔葉蕭蕭人歸夕陽寺

答嗤字癖者

君不見太宗愛書玉匣藏蘭亭片紙珍吉光又不見遣  
使索書高麗王大名異國傳歐陽我耽書癖求書忙遍  
乞羣公搨硬黃烏絲界畫鴻溝長牙籤玉軸金琅璫磨  
以松煙墨和以蘭麝香兔毫走風雨繭紙輝鸞鳳真草  
隸篆逾琳瑯一字一珠價難量對客揮毫樂未央安排  
筆硯精且良心之所好誰能忘以頭濡墨顛而狂古來  
亦有醉墨郎山陰道士籠鵝償

題蕭棟菴封翁桐屋讀書圖

秋風瑟瑟天氣涼  
桐階滴露凝清霜  
憑虛傑閣撐中央  
對坐一檠燈吐光  
汝南舊族姓氏芳  
代生賢哲曰棣鄉  
綠陰深處讀書堂  
昴宿下降寒生芒  
擷取經腴滋味長  
高文典冊薰班香  
我披玉照神傍徨  
英姿颯爽來昂藏  
歸昌賀世鏘鸞凰  
振衣千仞鳴高岡  
遐搜博覽馳八荒  
上窮邱索兼墳皇  
澄懷千頃波汪洋  
聲出金石歌琅琅  
一縱一橫雄莫當  
手扶雲漢分天章  
不賦秋聲增感傷  
高蹤千載追歐陽

思歸

壬子夏在盤陽館中作此遣悶



噫吁嘻歸去來他鄉久客胡為哉旁人笑問歸何急請  
君聽我歌南陔南陔一詩戒孝養晨昏違侍嗟瓶罍昨  
日風今日雨風風雨雨歸思催梧桐一葉聲一滴滴入  
愁腸腸九迴翹首瞻雲三百里倚閭朝暮勞疑猜願祝  
來朝放晴霽歸舞斑衣學老萊噫吁嘻歸去來

鵲巢歌頌趙紱庭

錫恩孝廉

乾陵殿上鵲銜柴和聲鳴盛翔堯階清溪溪畔鵲銜火  
化作虬龍證因果咄咄君家鵲有巢不巢高樹巢杆梢  
問鵲爾從何方來繞杆三匝飛徘徊南風四起聲齊噪

瑞應直擬三公槐我聞太原郭氏稱雍睦烏鵲同巢兆  
多福又聞國風歌咏后妃賢鵲巢上應騶虞篇作善降  
祥理不爽德門餘慶流綿綿况復君才龍虎躍九萬扶  
搖薦一鶚馬蹄三月春風香行看威鳳巢阿閣君不見  
巢杆鵲

退補齋詩存目錄

卷四

古體詩

咸豐乙卯北上三十里鋪阻雨

游天甯寺小飲

龍爪槐醉飲

感恩紀事

讀家書有感

行路難

清江聞杭嘉克復喜而有作

贈陳馭軒明府

出門示兒曹

得先叔春圃公遺骸喜痛交并長句紀事

小宋方伯以三月三日次杜工部麗人行原韻索  
和走筆應之并東竹莊廉訪

次李恕皆觀察赴皖南任留別原韻

竹莊廉訪以東坡饋歲詩三首見示并索和章走  
筆應之兼東小宋方伯

黃鶴樓招飲

送熊東美比部北上

王仲珊茂才以詩見贈奉和却寄

游長春觀

燈檠歌

退補齋詩存卷四

古體詩

永康胡鳳丹月樵

咸豐乙卯北上三十里舖阻雨

風飄飄雨瀟瀟有客有客魂欲銷  
泥滑澆橋兀艱有車有車輪欲脫  
今朝登石徑明朝歷水隈東道之難難於  
蜀道攀崔嵬我行不得聊復止閉門聽雨茅廬裏  
茅廬清冷不成眠鄉思萬縷紛難理吁嗟乎  
上有白頭親親年倏忽逾六旬下有黃口兒  
兒耽嬉戲成嬌癡怪我恩恩事羈旅奉親教子  
兩無補濟世未垂竹帛名承歡空

憶蘭陔譜白頭黃口話深宵念我天涯無伴侶雨聲滴  
碎思鄉心不覺燈前淚如雨

游天甯寺小飲

段鏡湖

光清

廉訪由浙入覲行有日矣邀同袁

筍陔閣學

希祖

何小宋給諫

環

錢萍石宗丞

寶

青胡硯生太史

壽椿

游天甯寺

東風吹醉游人面游絲晴裊鞭絲顫馬蹄忙逐蝴蝶飛  
看花一路來僧院我客燕臺春復秋雖仕猶隱身如鷗  
十丈緇塵浣衣素往來談笑驕王侯王侯門第高無價

晨夕與居得休暇酒龍詩虎相招邀佳客句留晝繼夜  
器度端推段希逸吏治本從經術出青天上達九重

知親承

溫詔褒良弼

段廉訪宰鄞縣時有青天之目召見六次荷蒙

天語垂

詢山中高卧稱袁安一朝翔步登金鑾筆底光芒照萬

丈詩宗李杜文蘇韓仙姿更有何水部手種梅花月三

五倚馬日試千萬言風流合作騷壇主少年科第錢象

先紆青佩紫宮袍鮮贊襄樞務十餘載自期勳業圖凌

煙西江別有安定裔木本水源幸勿替後輩都稱老神

仙一官匏繫何阻滯富貴浮雲定自天離合悲歡亦偶

然彈指光陰似流水天涯芳草年復年  
竭來舊雨兼新雨道義論交傾肺腑  
獨我牢愁百不堪酒酣拔劍為君舞  
為君舞送君行繡衣持斧人爭迎  
錢塘江上海潮沸攬轡再到期澄清

龍爪槐醉飲

袁筍陔希祖

陸梅生

秉樞

胡硯生

壽椿

諸君游

南下窪龍爪槐醉飲次杜工部麗人行韻

三月三日天氣新風和日暖薰游人  
一花一柳描難真流鶯百轉聲圓勻  
呼朋出郭嬉暮春酒浮綠螳脯擘麟



先來袁景倩瑤琴一曲吹絳唇

善琴

後來陸劍南醉飲

沈酣花繞身

梅生善飲

更有安定吾宗親

謂胡硯生太史

氣味醇古

追漢秦盟心誓吸西江水一滴楊枝甦涸鱗富貴浮雲

我何有且談風月拋經綸羣公仙骨清無塵重價高於

席上珍文筆高華妙入神指引迷途爭問津及時行樂

酒千巡鳥為好友花為茵晴光淡蕩風吹蘋蝴蝶尋香

香滿巾醉歸手扶劉伯倫貪酌無量休我嗔

### 感恩紀事

庚申八月京師戒嚴周

芝臺

賈筠堂

兩相國陳

子鶴趙蓉舫兩尚書出屯外城奏帶部員十六

人鳳丹與焉役竣蒙恩賞加知府銜恭紀

十萬黃巾揭竿起中原滿地生荆杞內患未除外患生  
津門忽報夷船駛八月八日海水飛日光慘淡晴無輝  
倉卒徵兵衛畿輔登城徧插螭弧旗相國同心戀

丹闕力重千鈞繫一髮太宰司寇皆重臣耿耿元精貫

日月四傑齊名棟梁材房謀杜斷龍韜該謂周賈兩相

宰趙蓉舫司寇為戶兵刑工各執事奏派四部司惟我

外城辦事大臣濫竽稱不才羽書火檄馳旁午司農仰屋嗟無補蠢茲

小醜狂跳梁勿勝為笑勝不武天心厭亂銷戈兵夷酋  
悔罪爭輸誠天子聖明不耀武四海一家同太平  
不戰而威握勝算詔許通商大號渙遂教山海來  
梯航從此生靈免塗炭天顏有喜班師旋大開高  
閣圖凌煙新進頭銜二千石涓埃未報兢冰淵

讀家書誌感

咸豐辛酉十一月讀罷家書聲嗚咽梓鄉一別成滄桑  
逆賊蜂屯來西粵粵賊如虎兵如羊裹糧坐甲心皇皇  
未戰先逃為上策縱橫當道皆豺狼連年烽火警風鶴

金華郡小無堅郭幸留兩邑

永康武義

稱安全皮之不存毛

安託戊午八年八月秋天地變色風雲愁永康百里羽

書急新鬼故鬼鳴啾啾今年五月日十八賊匪初來不

嗜殺一朝蛇豕恣吞食可憐原野塗膏血二三百村一

炬焚四五千人淪楚氛讀聖賢書守節義嗚呼天竟喪

斯文

時殉難者皆庠序中人

吾邑僻處深山裏入坎出坎差可喜

詎料秋成又薦飢驚魂未定呼庚癸太息兵凶兼歲荒

焦頭爛額人斷腸何幸成城堅衆志補牢猶可追亡羊

邑城被陷自五月至九月克復

守土者誰克稱職兵燹而後頗靜謐請

旌請卹勸作忠保障城池勿再失慨念慈親逾古稀侍  
養晨昏心已違三千里外安無恙何時歸報三春暉上  
有三兄下三弟惟我一人客京邸卻喜仲氏張一軍痛  
掃殘氛如雨洗

鳳鳴統帶台  
勇屢戰皆克

### 行路難

癸亥秋挈眷出都將抵清江為南風所阻停泊  
宿遷幸不與敗軍相值

人生事事天安排禍福倚伏誰能猜天公有意南風阻  
途多荆棘心徘徊賊氛近皖復逼豫鼙鼓動地聲如雷

月之十二日孟河全軍摧礮船九十六殘魄歸泉臺步  
兵騎兵如雲集調赴孟河干戈執詎料援軍風馬牛嗷  
嗷哀雁聲嗚咽飛檄乃復來清江調兵秣馬何倉皇千  
夫校百夫長大隊絡繹孟河往州縣苦賊復苦兵兵未  
出境心悵惘陸行索馬水索舟咆哮將士來江頭馬不  
可得舟亦少賈舶洶洶恣旁搜兵如虎狼客如鼠兵氣  
驕橫客無語登舟頃刻挂帆行東西南北誰敢拒彼蒼  
私我南風吹遲我三日到江許我舟竟作漏網魚自在  
中流任容與始嘆行止非人謀蓬底詩成傾綠醕

清江聞杭嘉克復喜而有作

客帆乍卸清江浦沈子見我色飛舞

紹興沈子雲

捷音昨日

紅旗飛二城收復完樓櫓我聞故人語喜從天上來喜  
心翻倒極俯仰有餘哀旋南攜眷屬妻妾兼嬰孩險過  
弱水患沈溺難於蜀道登崔嵬山村水驛三千里辛苦  
備嘗心膽摧縱使故鄉寇氛淨田廬竊恐生蒿萊浙中  
名勝無不有世變滄桑存與否故人慰我客中愁開樽  
醉以餘杭酒

贈陳馭軒

富遠

明府

江西人宰永康二年

咸豐辛酉粵賊至狼奔豕突恣吞噬官兵畏蕙紛逃亡  
賊勢縱橫誰能制咸陽一炬嗟延燒巢無完卵家漂搖  
死者屠腸復碎首生者額爛兼頭焦同治紀元賊卻走  
哀雁嗷嗷誰引咎兵荒之後疫繼之天災流行到處有  
今之令尹昔子文下車敷政絲無禁但願年豐無饑饉  
催科政拙原非病退食常懷三字箴銘心惟有清勤慎  
減糧薄賦甦民生草木欣欣枯者榮拊循瘡痍慰父老  
祇求實惠不求名吁嗟君縱不求名循吏之名誰與爭

出門示兒曹



兒來前筆為鋤耒硯為田兒在家先事詩書後桑麻我  
祖我父重耕讀勤儉持家衣食足遺經堂上留餘馨世  
世青衿綿似續憶余昔赴京都時一肩行李無人知匹  
馬單身走東道險阻艱難備嘗之荏苒京華數晨夕與  
道為隣仁為宅頻年清俸絀難支苦守兵曹室生白厯  
任風霜經十年 朝班日覲 九重天涓埃未報  
披豸服臣心如冰兢冰淵痛我奉諱始回里堂上萱花  
今已矣晨昏溫清忝所生母兮有子如無子吁嗟乎人  
生移孝能作忠忠未及盡親已終想像慈闈不復見百

身莫贖悲何窮一庭棟萼開七葉壘吹簫和聲聲協誰  
知叔季罹寇災為國捐軀遭浩劫爾伯叔姑五人存自  
遭烽火分戶門家務未諳問長者莫學紈袴忘卑尊爾  
弟同胞年猶少慎勿嬉游恣談笑讀聖賢書志遠大實  
學豈為名譽釣我今遠赴江南北千鈞重任肩難息兒  
兮兒兮聽我歌耕讀傳家紹祖德

得先叔春圃公遺骸喜痛交并長句紀事

十年烽火燭天紫荒荒浩劫悲生死吾家骨肉更流離  
後先殉難埋荆杞扁舟昨日來南陵滿目寒煙踏殘壘

季父遺骸何處尋了無碑碣題姓氏魂兮魂兮竟不歸  
臨風涕泗悲難已誰知遺愛猶在人往事士民芬桂齒  
長林蔓草爭攜鋤兄率其弟父詔子途遇老嫗知最詳  
為指荒祠左偏是陳氏宗祠被賊拆燬我履其地啟攢宮俄見白  
骨顙有泚當年殉葬年尼珠土中忽現色未燬區區一  
物重千金真偽攸分心竊喜無數國殤骨不歸公能歸  
骨何憾矣

小宋方伯以三月三日次杜工部麗人行原韻索  
和走筆應之并柬竹莊廉訪

三月三日天氣新風光澹宕娛詩人謫仙喜遇賀季真  
手揮花管五色勻曲高寡和如陽春同時鳴游鳳與麟  
我愛何大山吟久紅薇飛硯唇我愛吳季重咳唾珠玉  
花繞身更有靈光杖履親文章老手追先秦謂何雲我  
從皖公山之麓翛然出水如游鱗小住昔年記流寓朋  
簪今此何紛綸清風高韻無點塵名世同推希世珍讀  
書萬卷筆有神問途為我導迷津繩趨尺步身逡巡春  
花如繡草如茵一池綠水涵青蘋漉酒欲脫淵明巾不  
羨金谷石季倫醉眠惟恐花鳥嗔

次李恕皆觀察赴皖南任留別原韻

九月重陽前一日吳竹莊廉訪自章江來皖余  
病未痊嗣因竹莊抵蕪湖引陶詩但恨多謬誤  
君當恕醉人二語寓書同人恕皆觀察以此十  
字為韻首唱五古十首何方伯陳觀察和之冬  
月恕皆調署皖南道篆行有日矣余作送行詩  
卽步原韻奉答

世運際中興麟鳳育胎卵上下慶交孚臣鄰輸悃款神  
仙李鄴侯迴異林泉伴一見如舊交歡然心意滿光風

霽月懷令人祛妄誕我昨嬰二豎饋問未嘗斷旁觀為  
我危言此證頗罕何處覓良醫江右有秦緩倘無知己

知我生病豈但

八月初旬染病甚重怨翁朝夕來寓延請江西喻朵菴明府治之

知己不易逢得一可無恨感深鮑叔知愧讀管仲論我

才之與君什伯比千萬綺年黃甲登名齊荀士遜咫尺

蓬萊峯進尺而退寸騏驥上太行仰鳴忽俯噴君獨囂

囂然持躬泯尤怨款段還故山文章書驢券束帛來幾

幾未許邱園遜

十九歲登進士以知縣用請假回籍

朝考

邱園世何補不戀詩酒窠干戈值擾攘猛將思伏波殺

賊作露布豈效牆壁呵劍光隱龍雀陣法習鸛鵝團練  
衛桑梓經濟已云多衆女工謠詠醉尉遭譴訶君也見  
機明方軌怒濤過始作入山隱又作出山歌驅車赴京  
華離家奈遠何

君回里後大吏請辦團防堵禦回匪忽流言四起遂辭紳董北上

家山不易居京華猶可留避難萬里行山靈當見宥願  
捧毛義檄甯辭督郵候生民恃保障不在掾甲冑遼東  
古名疆俗樸少戰鬪經術飾吏治窮年尚殫究割雞用  
牛刀戲耳語非謬學道則愛人內省原無疚一片慈祥  
心不分薄與厚

棟發奉天知縣歷署海城新民各邑政聲卓著

君心本慈祥君才推獨步姓名達

九重循吏薦非

誤

曾相國係薦於  
朝奉命調皖

清風晉胡威直聲漢長孺攬勝燕昭

臺弔古望諸墓誰知渡江來荆棘生滿路銚鹿東西馳  
翦梟士卒戍開道使君賢閱歷通世故寅僚見之嘆使  
君來何暮有懷皆欲白無不抒平素

平素有奇氣談笑却千軍江南滿烽燧高壘起風雲蒙  
毫多伏莽賴君芟剔勤王師忽雨降遂殲狐兔羣鴻雁  
哀嗷嗷由此歸鄉粉瘡痍手摩撫德政遐邇聞一麾來  
賴水草木亦欣欣兒童竹馬迎望歲如使君父老扶杖



觀社酒春風醺

署亳州知州升補潁州太守

父老競攀轅不得見常常使君善治獄覆盆照太陽使  
君衣繡衣喜奉北堂觴何以慰色笑平反日皇皇我來  
初識君美酒傾鵝黃登堂為母壽臺階屢翱翔君母真  
雋母不疑君克當何復移皖南亦不已於行君疊歌驪  
駒我難賦河梁由潁州守蘭放廬鳳道奏署臬司余抵皖時適伯母八旬大壽  
河梁餞君行徘徊不忍去新知如舊交德飽勝膏飫此  
別見幾時明年在何處宦轍類轉蓬不可執冰語古來  
經緯畧立事先以豫共詡衛公才先借張良箸運籌與

備邊知君有遠慮宣歙本大都兼得江山助當今誰輩

行行徵張惠恕

時將赴皖南道  
任仍駐紫蕪湖

行輩亦多才此邦各位置傳經馬學士俟命惟居易栽

培桃李多所譽嘗有試

謂馬兩  
農學使

何遜我故人八皖屏藩

寄風骨高峻嶒嶸顯列非忝厠

謂何小  
宋方伯

龍川宋大儒不為

利名累文章擅雄豪著書不遑寐

謂陳心  
泉觀察

桓桓王將軍

戰功屢優賜交友如醇膠不飲令人醉

謂王峯  
臣軍門

醉吟慕太白文章不染塵下筆風雨快出新每推陳讀

君疊韻詩語語皆率真能使山水活不令花鳥瞋贈言

一何摯魂銷離別人森森歲寒柏濟濟旱麓榛度量涵  
淵海福祿自駢臻君轡不可挽余懷鬱未伸何時重翦  
燭論文誨諄諄

竹莊廉訪以和東坡饋歲詩三首見示并索和章  
走筆應之兼柬小宋方伯

几席陳肴核聊為杯盤佐異客在異鄉所居無奇貨贈  
我歲朝圖酒樽五斗大花果閒園蔬更有瘦羊卧庭實  
亦稱是披圖列飮座良友篤鶯鳴閑時旋蟻磨逍遙世  
外遊得過吾且過辛苦備嘗之今請甘受和饋歲

無事此靜坐翻覺冬日遲趣味淡彌永餘懽欣相追憶

自孟陽夏我來皖水涯故人何水部貧如京洛時

謂小宋方

伯裘馬與我共裘敝馬不肥我年逾四十恐貽老大悲

歲月堂堂去去亦不我辭來歲當努力與君俱未衰別

歲

似官還似客如畫添足蛇舊雨復新雨日日相邀遮欲  
去且少住歲其如我何家家聞爆竹兒童聲笑譁我獨  
卷書坐靜聽衙鼓過今夕是何夕春星簷角斜歲去不  
我與自悔多蹉跎祭詩還獨醉清閒向君誇

守歲

黃鶴樓赴飲

丙寅八月五日涼風微扇江水不波牟皓升嗣

龍陳仲耦建侯兩太守招飲黃鶴樓之具美堂

李玉階明埤何芷舫維鍵楊笠生儷珍三觀察

均在座王夢崧熙綰觀察因疾不至卽席賦贈

同人

我如倦鶴遊天末一飲一啄討生活我本野鶴性未馴  
翱翔江漢秋復春牟陳二公招鶴侶引我黃鶴樓頭看  
鶴舞黃鶴一去幾千年賸有危樓矗江渚主人款客開

瓊筵鳳髓麟脂玉液泉一杯一杯互酬勸高談幽賞娛

羣賢謫仙才調冠千古萬丈文光誰與伍衡湘自昔為

屏藩鶴有餘糧實天庾李王階由湖南糧道晉署藩司維揚何遜鶴丰

姿水部改為農部司今日持籌奠全楚挽粟飛芻裕度

支何芷舠由戶部改官楚北現辦軍需局務吏部文章中郎隸淵源本出子

雲系清白傳家守四知與我同舟期共濟楊笠生工詩善隸王

子養鶴嶺山隈籠中枯坐招不來餐粟不肥偏善病同

羣望鶴心徘徊謂王夢崧吁嗟乎羣鶴迴翔不常住一舉沖

霄來復去當年黃鶴樓中樓問鶴於今在何處斯樓浩

劫懼紅羊鶴不歸來樓亦荒世變滄桑百感集疑有老  
鶴華表翔羣公仙骨如鶴清我不能飛復不鳴安得一  
琴一鶴相與和聲競鳴盛但聞絃歌比户不聞風鶴聲

送熊東美

有筠

比部北上

西江之水章貢分西江之士秀而文文心如水清澈底  
中有神物噓風雲竭來鄂渚遇熊子腹笥便便富經史  
文山文章疊山詩步武前賢能繼起橫河橋畔初班荆  
欣然一見如平生咄咄神童世無敵據案作書筆有聲  
彈指光陰二十載各各頭顱成老態從來大器多晚成

下風低首常心佩博官不學干祿人錦心繡口金玉身  
讀書萬卷扶精奧下筆千言窺性真英氣逼人不可遏  
如錐處囊穎必脫莫因蠖屈學時妝好守君家舊衣鉢  
高軒過我經旬留縱談往事心相投好開三徑延益友  
何須萬戶誇封侯吁嗟乎儒冠誤人滯一第黃金耗盡  
貂裘敝狂來欲問天蒼蒼搔首臨風共揮涕茫茫塵世  
誰為歡富貴聊作浮雲看賴有文光射牛斗獨將隻手  
迴狂瀾如我樗材本落拓殘軀苦為一官縛馬齒徒增  
老大悲縱有良醫難救藥人生貴在心相知相知相勉



兼相期斯世豈無伯樂者會看騏驎風雲馳

王仲珊樹之茂才以詩見贈奉和却寄

衡門寂寞樓高人讀書養氣秋復春  
蠅屈未登玉皇案坐對青燈不厭貧  
一枝文筆聲鳴鳳兒曹受業伯與仲  
大兒宗廉次兒宗彥受業門下主人自愧非陳蕃  
下榻却邀徐穉重人生患無知己知  
頻年羈羈心含悲轉瞬秋風綻金粟  
唾手高折蟾宮枝

游長春觀

二月七日朱淡如

慰曾

太守招飲於長春觀邀

同楊笠生何芷舫兩觀察陳仲耦太守

人生行樂須及時千金莫放駒光馳百年聚會曾有幾  
良辰況值春遲遲春日遲遲太守宴太守者誰紫陽彥  
招邀同出城東門看花直到長春院院中長老方山中  
不知塵世秋復春自是君身有仙骨三生石上參前因  
初逢揖我升堂坐黃庭一卷聞清課少閒引我登樓觀  
四圍錦繡花成團梵宇初成美輪奐費盡緡錢十萬貫  
踏青士女紛如雲頂禮焚香玉皇案巍巍東嶽開行宮  
長春觀東新修東嶽廟引入勝西復東五步一停十步憩游絲

裊裊颺晴空長日如年天未午  
盧後王前行接武主人款客開  
瓊筵花香酒香沁肺腑吁嗟人  
壽能幾何一年佳日春秋多會  
待西風放叢桂攜壺同醉花婆  
娑

### 燈檠歌

焚膏繼晷攜燈檠寸光照徹三  
更清獵獵西風裂窗紙隔牆紡  
織諧吟聲銅盤燼落衣袂冷凍  
月一縷窺簾旌遊子辭家往何  
處放眼茫茫無伴侶祇愁身老  
名未成知己空懷孔文舉夜闌  
獨坐燈花紅高吟達旦日生東  
忽然彩筆落吾手萬丈光芒耀  
星斗兒時書味問誰知

猶憶長宵照窗牖

五ノリ言イシ

一

藏板